

Tunggu Mac sama ada semak semula Bajet 2016

» Kerajaan kekal dasar urus belanjawan selagi mampu

Oleh Ahmad Fiesal Othman
fsal@bh.com.my

Kerajaan tidak bercadang menyemak semula Bajet 2016 sekurang-kurangnya sehingga suku pertama tahun depan meskipun harga minyak mentah global terus mencatatkan penurunan.

Timbalan Menteri Kewangan, Datuk Johari Abdul Ghani, berkata penurunan harga minyak global sehingga ke paras kira-kira AS\$36 (RM154.64) satu tong sekarang hanya menjejaskan kira-kira RM3.6 bilion kepada hasil kerajaan dan jumlah itu masih terurus sekalipun



Johari (dua dari kanan) bersama **pemenang SSP Cabutan Bulan November 2015** pada Majlis Cabutan Sijil Simpanan Premium BSN di Petaling Jaya, semalam.

[FOTO ZULFADHLI ZULKIFLI/BH]

berlaku penyusutan kira-kira RM3.6 bilion kepada hasil kerajaan.

Beliau berkata, selagi mampu membuat penyelarasan terutama terhadap perbelanjaan pembangunan, kerajaan tiada keperluan untuk

menyemak semula Bajet 2016 walaupun harga minyak dijangka jatuh di bawah AS\$30 (RM128.86) satu tong berbanding AS\$48 (RM206.18) setong ketika bajet itu dirancang.

“Bagaimanapun, kita akan

menunggu sehingga suku pertama tahun depan sebelum membuat sebarang keputusan sama ada Bajet 2016 itu perlu disemak semula sambil membuat pemantauan teliti terhadap ketidakpastian harga

minyak global,” katanya ditemui pada Majlis Cabutan Sijil Simpanan Premium (SSP) Bank Simpanan Nasional (BSN) di Petaling Jaya, Selangor, semalam.

Kejatuhan harga minyak

Januari lalu, kerajaan sudah menyemak semula Bajet 2015 berdasarkan AS\$55 (RM237) satu tong berbanding AS\$100 (RM430) setong ketika bajet itu dirancang disebabkan kejatuhan besar harga minyak.

Bajet 2016 dirancang berdasarkan harga minyak AS\$48 satu tong, namun sejak beberapa minggu lalu harga minyak mentah Brent berlegar di bawah paras AS\$40 (RM171.82) satu tong.

Dalam pada itu, Johari berkata, kerajaan bersedia mempertimbangkan cadangan pelaksanaan sistem apungan terkawal harga minyak secara mingguan sekiranya tidak membebaskan pengendali stesen minyak dan rakyat.

“Mereka (pengusaha stesen minyak) akan mengemukakan memo pada minggu depan dan kita akan minta Kementerian Kewangan menganalisis perkara itu serta melihat sama ada kita bersedia atau tidak untuk membuat semakan secara mingguan,” katanya.

Cadangan semakan harga runcit petrol RON95, RON97 dan diesel secara mingguan dikatakan dapat mengelak lebih 3,200 pengusaha stesen minyak di seluruh negara daripada mengalami kerugian.